

106 年度校友總會優秀獎學金得主與得獎感言得獎感言

科 系	臺灣語文學系
姓 名	施O玟
得獎感言	<p>其實濟濟同學比我閣較優秀，我知影家已猶有真濟需要拍拚的所在，非常感謝校友提供這項獎學金，嘛十分感謝系上所有教授，願意予我機會成做106學年度校友總會獎學金的台語系代表，多謝同學、朋友的鼓勵kah 陪伴，閣有感謝強大後盾親人的支持，逐家予我的關懷kah 肯定予我閣較堅信大學這逝旅程無拍損。</p> <p>大學教育意在博聞廣學，深究自己專業領域。俊源教授時常 leh 講：「性命中的智識愛佇生活中學」，我深刻體會著原來我愈刁工無欲去接觸的，到落尾猶原愛面對。比論講：社團，本來是依個人興趣來加入社團、去認捌一陣志同道合的人，甚至會得建構深厚情誼；大一、大二攏有參加台灣傳統戲曲社，其實我真感觸這兩年來的社團變化，雖然大一時我只是社員，毋過一入社猶無感覺，若準欲辦成果發表就會發現「因為社員不足」致使難呈現完整的戲劇，這有影是較拍損！升大三的時，擔任系上教授所承接教育部或國科會計畫的兼任助理、工讀生，閣因為大三課業正是各系所的上重要的階段，濟濟事項的時程安排變甲閣較重要。</p> <p>參加過社團了後，我發覺家已並非是真心恰意這個社團，因為我看著其他成員 in 對歌仔戲有閣較濟的興趣kah 熱情，雖罔參加社團嘛會當學著跛步手路，毋過我無像 in 遮爾歡喜、遮爾熱情 leh 學，所以愈來愈感覺是一種壓力。一方面我真歡喜有真正恰意歌仔戲、有想欲傳承落去的人選，另外一方面我嘛感覺家已真無彩，到落尾煞猶是無揣著家己的興趣，總--是有學著欲按怎拍算時間安排的重要性矣！</p> <p>有濟濟同學 in 知影大學無應該干焦讀冊爾爾，所以 in 佇社團的表現嘛出眾，學著閣較濟按怎恰人盤攔的銳角。我感覺 in 真厲害，毋但兼顧系上專門課業、師培課程、社團，猶閣有工讀，這攏是 in 青春史的一部份爾爾，見證 in 拍拚、奮鬥的記錄。真歡喜我會使佇大學拄著遮有才情的同學kah 朋友，予我會使 kah in 學習！</p>